

二五三六八

歷代各家尺牘

魏晉尺牘

上海文書局印行

856.1
6

816
100

中華民國十六年九月出版
中華民國十六年九月發行



分售處

23368

發 發
行 行

中 華

燕湖 南京 杭州 福州 廈門
吉林 煙台 鄭州 青島 東昌
徐州 蘇州 長春 新加坡

北京 天津 張家口
重慶 長沙 常德 衡陽

歷代名魏晉尺牘 (全一册)

歷代名家尺牘例言

書啓牋簡名目不一綜覈義實各有隸屬茲從周氏尺牘新鈔吳氏昭代尺牘例以定厥名較爲普通

本編之選注重文學專集總集刊本抄本博覽約取甄錄綦嚴

自周迄清年歷綿遠由質趨文由簡趨繁風會使然各有佳妙不得歧視每編簡首附以小傳論世知人不無裨益

言理言情言事論古論政論文短長兼錄駢散並收一編之中無體不備評論陋習未敢因依祇加圈點利便誦讀見仁見知會心不遠是在善學刊本相沿魯魚亥豕不無訛奪一字之類一句之疵灼知其誤或勇改之或逕刪之要以無碍上下語氣爲斷

卷頁多少各編不同或合數代爲一編或分一代爲上下卷短祚之朝采錄不多

歷代名家尺牘 例言

以次附後要於應有盡有

歷代名家尺牘 **魏晉尺牘序**

魏晉兩代去漢未遠當塗父子競以文鳴操長雄鼻丕擅典雅陳思文藻奮發踔父兄而上之世握靈蛇之珠家抱荆山之玉藏名山傳同好書記翩翩殊未足以罄其才也典午禪位稍陵遲矣皇甫之答辛曠何如有道之謝仕進叔子之戒子弟何如文淵之懼滿盈華亭昆仲東南遺寶利獲二俊典博如張華尙欽遲之書牘雖餘事乎而亦見其風采矣

民國十六年五月吳興王文濡識

魏晉尺牘作者小傳

魏武帝姓曹氏名操字孟德少機警有權數年二十舉孝廉爲郎起兵討董卓擊黃巾迎獻帝都許爲大將軍進位丞相加九錫爵魏王卒諡武子丕篡漢追尊爲武帝

魏文帝武帝子名丕字子桓操卒嗣爲丞相魏王廢獻帝爲山陽 篡漢都洛陽國號魏帝性好文學有典論詩賦百餘篇

劉廙魏安衆人字恭嗣初爲丞相掾屬轉五官將文學文帝卽位官侍中封關內侯

董昭魏定陶人字公仁舉孝廉除廩陶長柏人令袁紹以爲參軍旋領魏郡太守後事太祖及明帝卽位進爵樂平侯卒諡定

陳琳魏廣陵人字孔璋初爲何進主簿後歸袁紹嘗爲紹移書曹操數其罪狀時

操正患頭風及讀琳作翕然起曰此愈吾病紹敗歸操愛其才而不咎以爲記室琳以文章名時爲建安七子之一

阮瑀魏尉氏人字元瑜少受學於蔡邕後爲曹操司空軍謀祭酒管記室凡書檄多出其手徙爲倉曹掾屬卒

應瑒魏汝南人字德璉以才稱曹操辟爲丞相掾後爲五官將文學多識朝廷制度

應璩瑒弟字休璉文明二帝世歷官散騎常侍齊王芳卽位遷侍中大將軍長史曹爽專政璩作詩諷之復爲侍中典著作

曹植字子建封陳王十歲善屬文援筆立成文帝忌而疏之旣就國每欲求別見幸冀試用終不能得悵然絕望遂發疾卒諡思世稱陳思王

衛臻魏襄邑人字公振初爲漢黃門侍郎曹操表參丞相軍事轉戶曹掾文帝受禪遷侍中吏部尙書明帝時轉右僕射加侍中正始中進爵長垣侯卒諡敏

蔣濟魏平阿人字子通明帝時爲中護軍齊王卽位遷大尉後以功封都鄉侯卒
謚景

吳質魏濟陰人字季重才學通博爲五官將出爲朝歌長遷元城令文帝時官至
震威將軍假節都督河北諸軍事封列侯

鍾繇魏潁川人字元常漢末舉孝廉累遷侍中尙書僕射封東武亭侯繇善書與
胡昭並師劉德升繇書若飛鴻戲海舞鶴遊天世傳胡肥鍾瘦

文欽魏汴人字仲若齊王時爲前將軍代諸葛誕爲揚州刺史高貴鄉公初與母
丘儉舉兵討大將軍司馬師兵敗入吳爲都護假節鎮北大將軍幽州牧封譙
侯

阮籍魏尉氏人字嗣宗倜儻不羈嗜酒放蕩或閉戶著書累月不出或登山玩水
竟日忘歸每至途窮輒慟哭而返官至步兵校尉人稱阮步兵

桓範魏沛國人字元則正始中拜大司農時曹爽輔政以範鄉里老宿於九卿中

特敬之司馬懿起兵討爽範勸爽兄弟以天子詣許昌徵外兵自輔爽兄弟不能納而歸罪請死懿收範於闕下與爽同誅

管寧魏朱虛人字幼安黃巾賊起避亂居遼東三十七年始歸文帝以爲大中大夫固辭明帝及齊王屢徵不出卒年八十四

高堂隆魏平陽人黃初中爲堂陽長明帝卽位累遷散騎常侍帝大治宮室及崇華殿災星孛淫雨之變隆皆引經據典上疏切諫遷光祿勳卒

嵇康魏銍人字叔夜少有奇才博洽多聞拜中散大夫不就常彈琴以自樂後爲司馬昭所害康與山濤阮籍阮咸王戎向秀劉伶爲竹林之游世號竹林七賢
有嵇中散集

晉宣帝姓司馬氏名懿字仲達曹操時爲太子中庶子文帝時屢出師與諸葛亮相拒廢帝嘉平初殺曹爽代爲丞相孫炎篡魏追尊宣帝

東海王越字元超宣帝弟惠帝時封東海王永興初爲大都督討鄴惠帝西幸以

司空領徐州都督唱義迎駕永嘉初領兗州牧進司徒以禦劉聰入保京城尋加九錫卒諡孝獻

皇甫謐晉朝歌人字士安幼年不好學游蕩無度母對之流涕謐乃感激就鄉人受書勤力不息居貧窮自稼穡帶經而農遂博綜典籍百家之言徵辟皆不就隱居終身

荀勗晉潁川人字公曾仕魏累官侍中武帝受禪改封濟北郡侯拜中書監加侍中領著作進光祿大夫尙書令卒贈司徒諡曰成

羊祜晉泰山南城人字叔子武帝時鎮襄陽綏懷遠服甚得江漢之心官至征南大將軍伐吳病卒祜在襄陽時常登峴山卒後人立碑其地望其碑者莫不流涕因名爲墮淚碑

杜預晉杜陵人字元凱泰始中爲河南尹羊祜舉以自代拜鎮南大將軍都督荊州諸軍事伐吳平之封當陽縣侯卒贈征南大將軍故亦稱杜征南

薛瑩晉竹邑人字道言孫休時進散騎中常侍孫皓立爲選曹尙書光祿勳入晉爲散騎常侍太康中卒

陸機晉吳郡人字士衡少有異才文章冠世太康末與弟雲俱入洛後事成都王穎穎起兵討長沙王乂假機後將軍河北大都督被讒與弟雲並誅有陸平原集

陸雲機弟字士龍與兄機齊名號二陸成都王穎表爲清河內史轉大將軍右司馬穎晚年政衰雲屢以正言忤旨機被誅雲亦遇害有陸士龍集

蔡洪晉吳郡人字叔開初仕吳入晉爲州從事太康中舉秀才元康初爲松滋令有化清經十卷集二卷

張華晉范陽方城人字茂先學業優博以參贊伐吳功成封庶武侯拜侍中有博物志十卷

劉弘晉相人字和季少家洛陽與武帝同居永安里又同年共研席以舊恩起家

累官侍中荊州都督車騎將軍卒諡元

孫楚晉中都人字子荆才藻卓絕爽邁不羣參石苞軍事自負才氣頗侮易於苞苞銜之奏楚訕毀時政遂湮廢積年扶風王駿起爲參軍轉梁令惠帝初爲馮翊太守太康中卒

趙至晉代郡人字景真改名浚字允元徙遼西舉郡計吏太康中以良吏赴洛卒
嵇蕃晉譙國銍人字茂齊爲太子舍人

傅咸晉泥陽人字長虞好屬文庾純常歎曰長虞之文近乎詩人之作矣惠帝時官至御史中丞遭母憂去官後起爲議郎長兼司隸校尉卒諡貞

劉琨晉魏昌人字越石惠帝時爲范陽王城司馬以功封廣武侯元帝稱制江左琨遣長史溫嶠上表勸進轉侍中太尉段匹磾忌之遂爲所害

擊虞晉長安人字仲洽泰始中舉賢良拜中郎擢太子舍人除聞喜令後歷秘書監衛尉卿光祿勳太常卿遭亂餓死

魏晉尺牘小傳

鄭方字子回

八

魏晉尺牘目錄

- 與王脩書 魏武帝 答繁欽書 報吳主孫權 與吳質書 又與吳質書 九
日與鍾繇書 又與鍾繇書 鑄五熟釜成與鍾繇書 與孟達書 答王朗書
與王朗書 以上魏文帝 謝劉表牋 答太子命通草書書 戒弟偉書以上
魏劉廣 與袁春卿書 作曹公書與楊奉 以上魏董昭 爲曹洪與世子書
答東阿王牋 以上魏陳琳 爲曹公作書與孫權 魏阮瑀 報龐惠恭書 魏應瑒
與滿公琰書 與西陽令孔德琰書 與從弟君苗君胄書 與侍郎曹長思
書 與廣川長岑文瑜書 答韓文憲書 與劉文達書 與董仲連書 與尙
書諸郎書 報東海相梁季然書 以上魏應璩 與吳季重書 與楊德祖書以
上魏曹植 答魏太子牋 答東阿王書 以上魏吳質 答蔣濟 魏衛臻 遺衛
臻書 魏蔣濟 報太子書 魏鍾繇 與郭淮書 魏文欽 答伏羲書 奏記詣蔣

- 公以上魏阮籍 與管寧書 魏桓範 答桓範書 魏管寧 答卞蘭難取鐘 魏高堂隆 與山巨源絕交書 魏嵇康 以書喻孟達 報夏侯玄書 以上晉宣帝
- 與江統書 晉東海王越 答辛曠書 晉皇甫謐 爲文王與孫皓書 晉荀勗 與從弟琇書 誠子書 以上晉羊祜 與王濬書 晉杜預 爲吳主皓請降書 晉薛瑩 至洛與成都王牋 與趙王倫牋 薦戴淵 以上晉陸機 答車茂安書 與楊彥明書 吊陳永長書 以上晉陸雲 與刺史周俊書 晉蔡洪 與褚陶書 報雷煥書 以上晉張華 與東海王越書 與劉喬牋 以上晉劉弘 爲石仲容與孫皓書 晉孫楚 與嵇茂齊書 晉趙至 答趙景真書 晉嵇蕃 諫汝南王書 晉傅咸 與石勒書 答盧諶書 以上晉劉琨 致齊王問牋 晉摯虞 獻齊王問牋 晉鄭方

魏晉尺牘

與王脩書

魏武帝

君澡身浴德。流聲本州。忠能成績。爲世美談。名實相副。過人甚遠。孤以心知君。至深至熟。非徒耳目而已也。察觀先賢之論。多以鹽鐵之利。足贍軍國之用。昔孤初立。司金之官。念非屈君。餘無可者。故與君教曰。昔遇父陶正。民賴其器用。及子媯滿。建侯于陳。近桑弘羊。位至三公。此君元龜之兆。先告者也。是孤用君之本言也。或恐衆人未曉此意。自是以來。在朝之士。每得一顯選。常舉君爲首。及聞袁軍師衆賢之議。以爲不宜越君。然孤執心。將有所底。以軍師之職。閑於司金。至於建功。重於軍師。孤之精誠。足以達君。君之察孤。足以不疑。但恐旁人淺見。以蠡測海。爲蛇畫足。將言前後百選。輒不用之。而使此君沈滯治官。張甲李乙。尙猶先之。此主人意待之不優之效也。孤懼有此空聲。冒實淫。亂耳。假有斯事。亦庶鍾期不失。

聽也。若其無也。過備何害。昔宣帝察少府蕭望之。才任宰相。故復出之。令爲馮翊。從正卿往。似於左遷。上使侍中宣意曰。君守平原日淺。故復試君三輔。非有所開也。孤揆先主中宗之意。誠備此事。既君崇勲業。以副孤意。公叔文子與臣俱升。獨何人哉。

答繁欽書

魏文帝

披書歡笑。不能自勝。奇才妙伎。何其善也。頃守宮王孫世有女曰瑣。年始九歲。夢與神通。寤而悲吟。哀聲急切。涉歷六載。於今十五。近者督將具以狀聞。是日戊午。祖於北園。博延衆賢。遂奏名倡。曲極數彈。歡情未逞。白日西逝。清風赴闌。羅幃徒祛。玄燭方微。乃令從官引內世女。須臾而至。厥狀甚美。素顏玄髮。皓齒丹脣。詳而問之。云善歌舞。於是振袂徐進。揚蛾微眺。芳聲清激。逸足橫集。衆倡騰遊。羣賓失席。然後修容飾妝。改曲變席。激清角。揚白雪。接孤聲。赴危節。於是商風振條。春鷹度吟。飛霧成霜。斯可謂聲協鐘石。氣應風律。網羅韶濩。囊括鄭衛者也。今之妙舞。